



EKO 2018-11 sendita el Roterdamo la 22an de aprilo

## Estraro en Roterdamo

Se estas aprilo, devas okazi la ĉiujara fizika kunsido de la Estraro de UEA. Tio daŭris tra preskaŭ tridek horoj kaj tri tagoj. La konsisto estis preskaŭ plena – mankis nur nia azia estrarano, LEE Jungkee, momente en Japanio, kiu partoprenis du horojn per Skajpo. Kompense, en Roterdamo volontule restadis komitatano HUANG Yinbao (Trezoro), kandidato por la Estraro, kies elektiĝo per reta voĉdono estis konfirmita frue en la kunsidado. TEJO sendis observanton – Charlotte Scherping, ILEI same – Mirejo Grosjean; la projektoj de tiuj partneroj ricevis multan atenton.

Neeviteble la financoj staris centre de la atento: la Asocio frontas gravan deficiton en la jaraj spezoj, kaj la Ĝenerala Direktoro, Martin Schaffer, prezentis raportojn kaj analizojn pri la rezultoj de 2017, la evoluoj en 2018 kaj la prognozoj por 2019. Pri tio venos baldaŭ pliaj detaloj. Per intensa kaj konstrua diskutado la estraro pretigis kelkajn signifajn reformproponojn por la konsidero de la Komitato en Lisbono, kiel unua paŝo al resanigo de la financoj. Alia gravega temo estis la evoluigo de la nova retejo de UEA, kiu ne nur montros pli allogan retpaĝan aspekton kaj navigeblon, sed donos multe pli da flekseblo, interalie en la traktado de la asocia administrado. Partoprenis la plimulton de la kunsidado Ana Ribeiro, kiu staĝas en la oficejo dum tri monatoj por pretigi la transiron el la nunaj retejoj kaj datumbazoj al la novaj. La lanĉo okazos en kelkaj etapoj; la unua, ene de mallonga tempo, disponigos al nia membraro novan membrospacon por faciligi kontaktadon kaj kunlaboron.



Por antaŭenigi la informadon pri Esperanto, la rilatojn kun UN kaj Unesko, la instruadon de la lingvo kaj la trejnadon de aktivuloj, la Estraro interkonsentis pri pluraj paŝoj kiuj celas malfermi la Asocion al pli diversnivela konkreta aktivado de niaj membroj, kaj pli konstanta kaj inspira fluo de informoj pri tiaj

Foto liverita de Mirejo Grosjean: la estraro kun oficistoj kaj volontuloj de la CO.

iniciatoj. La Jaro de la Esperanta Kulturo, inspirita de la rekono de Unesko al tiu “nemateria heredaĵo”, estos bele festata kadre de la 103-a UK en Lisbono. Tie krome unufoje okazos AMO-seminario (kredeble la 50a), kun temo gravega kaj aktuala: ‘Kiel UEA transformu sin por logi kaj reteni membrojn?’ Prepara artikolo por tio aperos en la junia revuo *Esperanto*.

Sekvos pli formala kaj kompleta resumo pri la kunsido, unuavice por la komitatoj.

SMG/MF

## Informilo por Interlingvistiko

La novaj eldonoj de Ipl (Informilo por Interlingvistoj, 104) kaj Ifl (ĝia anglalingva eldono: Information for Interlinguists, 04) haveblas rete:

### Ipl (Esperante):

Nova numero: [http://www.esperantic.org/wp-content/uploads/2018/04/Ipl\\_104\\_final.pdf](http://www.esperantic.org/wp-content/uploads/2018/04/Ipl_104_final.pdf)

Pli fruaj numeroj: <http://www.esperantic.org/eo/publikajoj/ipl/>

### Ifl (angle):

Nova numero: [http://www.esperantic.org/wp-content/uploads/2018/04/IfI\\_04\\_final.pdf](http://www.esperantic.org/wp-content/uploads/2018/04/IfI_04_final.pdf)

Pli fruaj numeroj:

<http://www.esperantic.org/en/publications/ifi-information-for-interlinguists/>


Informilo por Interlingvistoj estas publikaĵo de Esperantic Studies Foundation (ESF) kaj Centro de Esploro kaj Dokumentado pri Mondaj Lingvaj Problemoj (CED). Ipl kaj Ifl disponigas informojn kaj ĝisdatigojn en la kampoj de planlingvoj, interlingvistiko kaj lingvoplanado. Ambaŭ eldonoj enhavas detalojn pri eventoj, novaj publikaĵoj, raportojn pri lastatempaj konferencoj, kaj disponigas informojn por universitatoj kaj ĉiuj, kiuj interesiĝas pri interlingvistiko kaj rilataj kampoj. La limdato por kontribui al la sekva numero estas la 30a de junio, 2018.

La redakcio (Humphrey Tonkin kaj Ĵenja Amis); [ipi@esperantic.org](mailto:ipi@esperantic.org)

## Dum la Lisbona UK okazos Internacia Infana-adoleskanta Kongreseto, **IIK**.

Aliĝis 20 **knaboj** (6 ĝis 16 jaraj), sed nur 8 **knabinoj** (8 ĝis 16-jaraj), zorgataj de 10 **eksinfanoj**.

La **IIK-ejo** estas samtempe la plej pitoreska **UK-dormejo** (plu mendebla!) kio ebligas ke gepatroj povas kun siaj infanetoj dormi sed iri tage al UK per rekta buso. La nunaj **IIK-prezoj** plu validas ĝis la 30a de aprilo. Respondu rekte al [<infana.kongreseto@gmail.com>](mailto:infana.kongreseto@gmail.com)



Vortoj = 660



Ĉi tiu komunikilo estas disponebla

laŭ la permesilo Krea Komunaĵo Atribuite Samkondiĉe 4.0 Tutmonde.

Por pli da informoj vidu ĉe: [<https://creativecommons.org/licenses/by-sa/4.0/>](https://creativecommons.org/licenses/by-sa/4.0/).

Aperintaj komunikiloj legeblaj ĉe: <http://aktivulo.net/eo/content/komunikoj-pri-agado>

**ALDONU VIN:** Skribu al [<stefan.macgill@ce@gmail.com>](mailto:stefan.macgill@ce@gmail.com). Neniu alira kondiĉo aldone al valida retadreso. Malferma al Aligitaj Membroj, eksmembroj, neniam-membroj, volapukistoj ktp.

**SUBTRAHU VIN:** Skribu al la supra adreso. Donu vian nomon, retadreson, landon kaj (se eble) la grupon aŭ kialon por via ĉeesto en la ekspedolistoj.